

巢經巢集

冊三

巢經巢詩集卷第三

運義鄭珍子尹

古今詩共七十首

渡桶口

門前溪水如奔馬流入烏江到此津我向津頭問江水朝來應見白頭人

安化道中

崎嶇安化道甚似歷蠶叢天半負棉白人頭懸石紅竿船筒米飯

販運道思銅者率以肩戴

所以戴之具曰竿船

杉壁牯牛風

山中風發店壁爲破俗謂牯牛風

漸起殊鄉數艱塗況未窮

偏崖

未到偏崖時心欲尋別路既過偏崖時行行屢回顧

曉登銅崖

一百八灘經過盡披衣曉起踏銅崖雙江一碧渺然去孤嶼中流無限佳水氣

昏昏迷雉堞人煙穰穰闕魚鮭山川自古征蠻地博得登臨寫壯懷

銅仁江舟中雜詩六首

江行無百里江景已多更問地難爲字經灘不計名敗牀眠白鯉疎塢出黃橙
欲識銅仁近奇山滿眼生

漸見寒流闊居人兩岸分潭光清漏石山影綠搖雲漁得沙頭訊炊香柁尾聞
向來風味熟惆悵但離羣

銅舟三日慣快若鳥輕鈔詩待灘平寫書緣境勝拋生薪常失飪寒菜旋充庖
道里時相問黔荆路已交

蛟龍非獲罪風水自無猜朝夢同炊熟晨舟隔縣開江鳴知雨到鴨語覺邨來
半起先勞謝閑鷗候岸隈

爛石通緯路荒唐落埃泥潮收沙露尾槳過水生臍魚翠閒閒立鵝青閃閃低
勞生慚對汝方憶漆園妻

景色辰陽變風煙夢澤通山平趨落地江遠欲吞空曠岸一庵白晴砧雙婦紅
狂歌仍入楚陳爪歎泥鴻

明月池寄鄧湘皋

顯鶴

詩老

鄧子詩才妙天下不見風流今幾年長沙日落渺何處繫馬堂階應醉眠明月池頭苦相望孤舟江上但寒煙得書儻遇長安使折取梅花寄歲前

武陵燒書數

并序

十二月朔泊桃源夜半舷破水沒半船翌抵武陵啓箱篋皆透漬烘書三晝夜凡前所鈔述者或燒或焦半成殘稿爲之浩歎

烘書之情何所似有如老翁撫病子心知元氣不可復但求無死斯足矣書燒之時又何其有如慈父怒啼兒恨死擲去不回顧徐徐復自摩撫之此情自癡還自笑心血旣乾轉煩惱上壽八十能幾何爲爾所累何其多

公安

可哭公安縣沉災竟四年萬家何處去諸賦暫時蠲魚鱉蟠廬墓舟筒當土田更堪聞邑長歲剩百千緡

松滋

松滋前決口聞尙駐工官四載已云久一隄如此難春江寧禁漲遺戶得無殫
寄語修防吏盤飧爾固安

傷歌行二首襄城除日作

男兒生世閒窮達有命不自由黃金便使高北斗能衣晏子幾狐裘拂塵下馬
卸馬鞍舉盃自勸歌路難路誠難莫復怪故山兒女豈不佳斲雪斫冰君自愛
一夕復一夕一朝復一朝朝夕遞相送歲盡何必在今宵噫乎歲如江上之波
我如中流之石抵盪磨來波去浪渺無盡石行泐矣當奈何酒盃融融吾留六
龍六龍不留我心苦夜半高歌淚如雨

元旦石固

已下乙未

大鵬南畔午停舟小澗東頭步寫憂並路牽衣兒有母望鄉遮眼樹無籬銀旛
士女王正月落日河山古豫州孤迴天涯正悽絕誰家歲盡擁高樓

人日度滎澤口

黃流滾滾自天來夜斬層冰曉楫催廣武山頭初日上大梁城北亂雲開親心

逐子前年度遊轍何時此濟回多謝河公好看客安瀾空望古今才

邯鄲

盡說邯鄲歌舞場客車停處草遮牆少年老去才人嫁獨對春城看夕陽

湯陰謁岳祠

蕩陰城東喬木寒下馬岳祠瞻表桓悵望公生一洒淚蕭條雨歇獨憑欄長城道濟才無媿異姓汾陽福竟難更苦西鄰有冤聖請歌文操慰忠肝

經嵒侍中祠

碧血飄零雲鳥悲雪中憑軾弔荒祠似聞叔夜冤魂語不及王儀尚有兒望蘇門懷孫鍾元先生

積雪高寒見夏峯百泉知傍草堂松鸞皇嘯斷無消息誰念塗窮哭嗣宗

謁比干墓

墓禽知敬久無音樵採含悽遠不侵氣共微箕存祖社魂傷姬孔表岡林千秋死諫無公酷半日句留望古深壘畔請攜卷石去校閒時見昔年心

一石與心絕肖持以

南陽道中

先車雨過塵方少未夏邨明望不遮林脚天光如野水麥頭風醖度晴沙春當上已猶無燕地近南都漸有花晝睡十分今減半爲留雙眼對芳華

宿潁橋

我行古潁谷慨懷潁封人當日君臣直兒戲許以純孝殊不倫鄭莊能使祭足謝中肩豈有見生母必欲及黃泉人臣格非有正道教君遂過烏得賢寤生既不孝考叔復不忠不忠遺母羹不孝將毋同

三月初十沙洋

漢水東南流奔浪日夜急機舟感今日吾年倏三十兒女齊送我老路從此入精力更幾何前去正難執且樂現前得買酒沙洋集

自沙洋步至黃家林就舟二十里邨景佳絕

欲就東湖船先舍漢津槳隔岸知境異越隄果幽爽春草碧淺淺新樹團益益

鳩鳴宿雨餘人耕舊墟上秀圃蔥薤花小橋沒菰蔣麥深不見人時聞輓車響
傍道多草舍老翁聚三兩偶憇知餽茗味惡誠足享北來厭塵沙茲京勞夢想
緩步殊未久舟已叢芮榜清謠煙水閒餘歡獨攜往

網籬行

并序

公安五年水民食於漁而居稍高地其種菜卽以敗網爲籬亦奇觀也
公安民田入水底不生五穀生魚子居人結網作耒耜耕水得魚如得米高田
魚落田反蕪生魚之地變生蔬網亦從之變其用環蔥繞芥如圍魚以蔬佐魚
生已蹙以網作籬還詫目苟且窮算得新創何遽絲乃不如竹蔬花簇簇蔬葉
披貓戲網中雞隔窺想見鸕鷀與獮獺出入籬際驅魚時不愁網破籬無補但
懼水反魚游圃此時籬倒蔬亦無頓頓餐魚奈何許

已過武陵

記我出都門榆柳未知春行得山水綠望家如隔鄰隔鄰未卽到人情覺已親
匪獨人情親我亦愛我身萬里雖無功生存還二人風水見憐我雲日亦相因

監沅已去眼幾日銅江濱在遠止知歸家近始念貧預愁小兒女不解諒苦辛
入門索包裹惻惻傷吾仁

望鄉吟

一灘高五尺十灘高五丈行盡銅溪四百灘銅厓應當白雲上厓上還有千萬
山一重高出一重顛待到銅厓望鄉國始似從此看雲閒山高如梯水如箭到
家早晚櫻桃綻心隨飛鳥去悠悠白髮紅綳眼中見萬里真成一夢游茗山重
認雨中舟桐花落盡春風老杜宇催人坐白頭

辰溪縣北三十里許水東岸皆峭壁猿鳥所不到其上有樓閣闌楯箱
匣之屬曰僊人巖其石斑如狗迹者曰狗足巖其西岸蒼厓界白蜿蜒
斜上如龍狀者曰白龍巖俱奇譎可翫舟行經此戲爲之詩

神僊愛樓居亦復喜峭僻辰陽山水窟上古斷人跡僊者忘其名於此結靈宅
下映百丈潭上接千仞壁朝服砂五色暮食茆三脊潭中白龍子時時受餘液
不知幾千載僊眷有分析廣構嵌穴閒幾至無剩隙此時盤瓠氏子孫正昌熾

名山出帝賜荒巖任游息一朝驚見人奔赴急欲齬泅水不沒鼻踏厓如履席
亂走汗石花吠聲入空碧僊者謂行乎羣犬勢已逼寶劍不及攜丹經不及匿
舉室盡飛昇諸物奔狼籍白龍起相從猝上誤觸石尺木爲所傷乾死挂蘄薊
元精死不泯一線透巖石君看斗壁上遺跡尙歷歷漫衍作歌詩因之寄桑鄺
雪中度吳橋至郡齋

止覺百無路來循夫子牆問門迷入徑冒雪立平岡流水去不息此身行若忘
譙樓燈火見獨自下蒼茫

晨出樂蒙冒雪至郡次東坡江上值雪詩韻寄唐生

樂蒙城下碑負龜破曉捫讀了不知凍雨濛濛苦無笠半日撲面風逆吹近午
雪作如撒粟頃刻集徧眉與髭枯林沙沙蠶餐葉淺水索索冰溜澌田家盡爲
二麥喜大澤可堪行者危里程詫見幾新墻亦有僵倒命若絲行商早宿釋荷
擔野店閉門無所爲最有移民可憐愍十五五相攜持涕垂入口不得拭齒
牙癢痒風戰肌壯男忍負頭上女少婦就乳擔中兒老翁病軀呻且走欲至他

國知何時爾守爾令寧見此深堂密室方垂幃羊羔酒香紫駝熟房中美人爭
獻姿鹽絮尖叉自矜飾親諛幕贊紛淋漓樂者自樂苦自苦何由畫此陳丹墀
我今凍餒亦交迫破帽遮首單衣披臘盡不歸飽妻子荒山足繭愁奔馳平生
大言不自赧豈料皆成無當卮入城耿耿臥不寐民生家計愁心隨唐生臥雪
祇不見見我此吟當和之

追寄莫五北上

重安江前雪映天知君此時到其閒兩夫舁之擔一肩荒荒瑟瑟山復山子行
十日我西還播城雪夜雨似綿以吾念子衣枕寒知子於吾亦懸懸人事乖迕
堪浩歎隔六十里乃天淵舊約送子意頗繇既去矣復從何言少年科第世俗
便一日聲名卽聖賢子兮織錦古斑斑媚世復解渲牡丹又始弱冠誰不妍金
門玉堂無子艱念我才具未老堅論獻遠媿鼂賈班折腰屈膝又所難自計豈
能事上官雖云汝墳迫周警密縫之心亦可憐取彼償此心已酸況又未操必
得權吾以此乃今閉關縱有貴命寧弃捐父母俱存兄弟全癡兒問字妻紡棉

詎免身勞心以安但無遠別吾終焉子今偕計趨春官歷鍊駿骨閱山川河聲

嶽色浩漫漫吞納胸中同鬱盤獨慨宿學近頗慳罕聚輦轂散若煙阮

芸程海

二老海內觀子往謁之間淵源必有告子乎勉旃高堂雖老健加餐長昆弱弟
善承顏及茲餘暉快著鞭木天固有君舊甄然止藉此爲親歡得意慎勿受所
牽明年馳傳歸白田阿爺攜子笑欲顛阿孃撫子衣錦鮮孺人見子屏風邊我
從山中繫行纏秋堂與子對牀眠聽子聞見勝今年作詩一笑隨風傳

適濱卻寄子行

子俞

兩弟

已下丙申

冠雞非難得惟獨乃鍾愛踴踴白兔子吾思何能貸日者昔語我子限一星帶
看來兩不育此語信著蔡念我門祚薄麟鳳非所載或者瘠土中獨苗可望大
今來不吾教渠母料能代但恐性一傷稍大便難差端須提宗印使之自小佩
上稱宣尼說下稱程朱話

白水瀑布

斷巖千尺無去處銀河欲轉上天去水仙大笑且莫莫恰好借渠寫吾樂九龍

浴佛雪照天五劍挂壁霜冰

去聲

山美人乳花玉胸滑神女佩帶珠囊翻文章之

妙避直露自半以下成霏煙銀虹墮影飲猷壑天馬無聲下神淵沫塵破散湯
沸鼎潭日蕩漾金鎔盤白水瀑布信奇絕占斷黔中山水窟世無蘇李兩謫仙
江月海風誰解說春風吹上觀瀑亭高巖深谷恍曾經手挹清泠洗凡耳所不
同心如白水

自郎岱宿毛口

晨登打鐵關下見拉幫塘行至拉幫見拉當虛空鳥道四里強路若壁挂百盤
腸人行如狗盡日忙落日盤江出脚底仰視早行鼻尖耳我投旅宿憊欲死擔
丁舁夫更何似把盃大笑何所圖下山且爾歸何如山妻徒憶知得無

自毛口宿花壩

盤江在枕下伸脚欲踏河塘堠

毛口對岸卽河塘瀾流渡江至之已十里

曉聞花壩子規啼暮踏花

壩日已瘦問君道近行何遲道果非遠我非遲君試親行當自知此道如讀昌
黎之文少陵詩眼著一句見一句未來都非夷所思雲木相連到忽斷初在眼

前行轉遠當年止求徑路通悶殺人渠不管忽思怒馬驅中州一目千里恣
所游安得便馳道挺挺大柳行邊飯蔥餅荒山惜此江湖影

游清溪洞書石上二首

欲問老回今昔緣碧霄如夢夢如煙麻姑已嫁方平老知住華陽更幾年
洞門久坐松陰迴溪水自流花自開儻便得歸便歸去不須定待鶴飛來

平夷生

今年歲丙申今日月初十年是母生年日是我生日我年已三十母壽六十一
母老兒亦老兒悲何由說半世求祿心甘爲古人拙負母一生力枯我十年血
維母天地眼責命不責術但母得如此又敢自暇逸千秋非所知兒死此事畢
之卑浙廠道中

白袷衣當暖翠侵紅泥路入簷雲深松秧徧地生如草石炭隨山有當林蠶豆
香濃非故國馬頭春暮動歸心愁看落日停鞭處晚飯妻兒語樹陰

月夜誦山谷江湖吞天之作感次其韻

磨骨養腸胃賣舌撫脣口俯仰同桔槔肌肉隨薄厚計來真自苦誰逼君浪走上牀無錦褐下腹孰羔韭身世一窮了何者更掣肘挽畦羹淖糜緡澤貫楊柳夕偃心太平朝游大垂手怡聲問翁媪正色對親友陶公亦後覺持身易五斗安知公田秫中有惡獅吼靜念發深省窗月正相守欲持山谷詩歸謀東坡婦衣食端須幾百詠當飲酒

端午念阿姊

入戶桃陰夕照移久看蒲糲念嬌兒魯論半部應成誦渠母前朝早任嬉嫩綠胡孫高蹠臂雄黃王字大通眉鄉俗綴五色猴絲於兒肩上謂可稀痘以雄黃畫兒頭面謂辟邪云鳳仙籬側瓜棚畔料爾行吟新寄詩

讀日知錄

顧公宰相才老得忠孝名以言救天下不期當時行大運自秦來治具幾紛更元元萬古胸利病如列星傳來二百年考資巧儒生或非著書意掩卷三涕零自霑益出宣威入東川

出衙更似居衙苦愁事堪當異事徵逢樹便停邨便宿與牛同寢豕同興昨宵蚤會今宵蚤前路蠅迎後路蠅任詡東坡渡東海東川若到看公能

山行

路出盤江所濫觴萬山無主夕陽荒肩輿冷瘦尋邨遠石氣青紅過雨涼國陋翻宜叢檜大路難方覺苦苴香窮塗未倦平生意欲採閒花種夜郎

經行一路皆地廣大而民稀且窮官斯土者自中原來對此荒荒靡不愁鬱期滿秩遷去將終不能富庶也慨然賦此

日南九郡弃非圖滇土何堪任曠蕪龍亦有家思豢御豬皆名海占膏腴豬蓄水也但看插檜俱成樹何不宜桑獨少襦寄語邦君身已到未應愁歎了官租

袁海鉛廠三首

我何適茲土忽忽忘其方如入裸人國舊游文士場奇懷想不到異俗窮堪傷久對翻疑夢羣山墮渺茫

無斯煎煨利鬼亦掉頭還墨井人聲底爐場夕照閒百年無樹影衆皴是灰山

誰識荒荒頂飛鴻爪自閒

竈甬邊爐宿煤丁倚石炊妻兒閒待養喬罐死猶隨

鉛罐以喬計三罐爲一喬罐以鐵爲之長二尺許死

者多以廢罐砌墓視之如蜂房然

物力祇斯數生涯能幾時年年南北運不見窮山悲

廠山晚望

天青涼涼山暮環餘映未盡血殷殷碧雲四合曠無底白鳥一雙歸正閒雪嶺寒光蕩東爨夜郎遠影連西蠻荒岡插脚竟何事風土歲時俱可還

送黎子元

愷

舅自平夷歸里

送公遠至雙穗橋

在城東

白雲不動心飄搖仰天揮手一長歎萬山無語風蕭蕭

時難不作十全計要公歸家相料理我寧飢餓不出門若負此心有如水

中秋飲韓仲山

錫

學博官舍

韓博士家多美竹孔宣公宅有高樓荒城勝賞無他去此夕清狂可自由著我樓頭看皓月借君竹下過中秋銜盃却憶巴陵夜一點團山萬里愁

寄答莫五